

Rotstab Chlütteri¹ (-Waggis)

2015



VFG

(Vereinigte Fusionsgegner)

Region Bâlesace: s Elsass, zämme mit Baselland, das isch s'neue Waggisland!

Generell stellt me hüt fescht
und mir meine, s'syg nit s'Bescht,
dass uff dere Ärde
alls muess höher², grösser, anderscht wärde.

Dä Hang und Drang zum grosse Ganze
tuet eus Waggis weh im Ranze.
D' Eigenart und s'Individuelle
tüene im Grund gnoh nüt meh zelle.

Me fröhnt em Grössewahn, duraane,
me schrybt sich s'Wort „Fusion“³ uff d'Fahne,⁴
und will me Stadt und Land will zämme kitte,
Hei mir s'letscht Joor Quale glitte.

An dr Urne, Volk sei dank,⁵
Findt me denn dr richtig Rank:⁶
S blybt alles eus, mr teile nüt
Mit dene Baselstedter Lüt!

Wie sy mir doch e flyssge Schlag,
mr wärche meh as e jede mag,
Verboue s Gäld fascht jede Daag.
Und mr bätte, das mit Stiiil,
zum heilige Sankt Immobil!
D'Inveschtore inveschiere
und tüen e neuu Wält kreiere.

S wird gheblet, baggeret und grisse
und schöni alti Hüüser gschlisse.
Me tuet nümm kleckere, me tuet jetz chlotze
Und mänge Bürger find's zum cho... lerisch⁷ wärde.

Im Grund gnoh het me gmeint, me müess sich weere
gege d'Basler Syydeheere.
Doch langsam tuet mes regischtriere:
dass d'Oligarche⁸ eus regiere.

Au übel lauft im Elsass unde.
Dr Senat z'Paris het befunde
und het entschiede churz und knapp:
är schafft das Elsass eifach ab!⁹

Ohni Grund und ohni Nüt,
ohni Mitsprooch vo de Lüt
wird die „Region Alsace“ unschiniert
us em Atlas ussradert
und zuenere Grossregion fusioniert.

Die Heimat vo de Waggis – alle,
Die Wyyregion, wo Eus tuet gfallle,
S'Sparglenässe, wo mr all Johr bueche,
Münschterchees und Flammechueche,
Gugelhopf und Gwürztraminer
(isch fascht wie euse, numme fyyner).
Me operet das Land. Es isch fatal
der geschossene „Réforme territorial“.

Mir Chlütteri syy, dass das do klar isch,
Mit de Elsass-Waggis solidarisch!
Und mir sände jetzt uff allne Sänder:
„vereinigt Euch, Waggis, aller Länder!“

Wenn scho fusioniere, denn wär doch s Beschte
e Zämmeschluss mit dene Waggis im Nordweschte:
s Elsass, zämme mit em Baselland:
das isch's neue Waggisland!

Fuessnote:

¹ Chlütteri = eine der bedeutendsten (wenn nicht die bedeutendste!) Liestaler Tambouren- und Pfeiferguppe. Dem Nirwana nahe! Siehe auch: „Chlütteri“ = alter, verschrobener Mann.

² „zum Byschpil dr Roche-Turm“ mit 178 m das höchste, freistehende Bauwerk der Schweiz.

³ Fusion = „Verschmelzig“ (nicht zu verwechseln mit Kon-Fusion = Durch-einander, Verwirrung).

⁴ „Fahne“ = alkoholgeschwängelter Atem.

⁵ Fusionsabstimmung: 68,3 % der Stimmenden lehnen am 28. September 2014 die Fusion mit Baselstadt ab.

⁶ „Dr Rank finde“ = sich zu helfen wissen.

⁷ Cholerisch = erregbar, jähzornig.

⁸ Oligarch = Herrscher, der durch seinen Reichtum über eine Region weitgehende Macht zu seinem alleinigen Vorteil ausübt.

⁹ Ende November 2014 hat der Senat in Paris beschlossen, das Elsass als selbständige Region von der Landkarte zu streichen.